



## 有量就有福

鳳仔個老母八十外外來過身，雖然真毋甘，毋過想想咧嘛無啥遺憾，會當共一个行動不便、規身軀痛疼的老母，照顧甲勇 khat-khat、笑 bi-bi 佇眠夢中往生。

鳳仔交個翁是高中的同學，兩人相意愛，早早就結婚。個大家官經營銀紙店、雜貨仔店，生理真好。嫁入門了後，毋但愛加減看頭看尾，嘛愛款一家大細的食穿，甚至小叔、小姑的衫褲、便當，伊嘛攏款甲齊著。大嫂的角色，伊是做了真有起。莫怪大家官疼伊，小叔小姑共伊當做是序大，伊的翁婿嘛共惜命命，講伊是娶著好某較好得著好田園。

鳳仔是厝裡的細漢查某团，兄弟姊妹成家立業了後，各人有各人的家庭，為著趁食只好離鄉背里。個老爸過身了後，後頭就賭個老母家己一个咧生活。鳳仔倚家雖然離後頭無蓋遠，毋過駛車嘛愛一、二十分鐘，想欲逐日攏陪佇老母的身軀邊嘛是真僊，何況一家一業，伊嘛是無閒 tshih-tshih。毋過，總比已經無佇臺灣咧生焠的大兄大姊，伊是較觀會著，所以這個重擔伊就真歡喜共擔起來。

個老母佇六十外歲的時，無拄好跋倒，煞袂起床。兄弟姊妹參詳，想欲共老母送去療養院。為著這件代誌鳳仔是操心擘腹。翁婿毋甘伊規日憂頭結面，就招序大人參詳，共丈姆接來厝裡奉侍。翁婿的體貼、大家官的諒解，予鳳仔感激甲目屎掛目墘。

本來就盡心咧照顧一家大細的鳳仔，這聲猶閣較拍拚。小叔、小姑雖然有家己的家庭，毋過三頓的食食攏是伊咧發落。尤其是暗頓，下班的、放學的，一家二十外人倚來踮兩塊大桌那講那食，食甲喙笑日笑，講甲喙角全波，上歡喜的當然是個大家官。

鳳仔逐日透早攏愛走菜市，款甲大包細包、揸甲怱怱喘。飯是用大籬瓦斯鍋煮，菜是用大鼎炒。鳳仔骨格真幼秀，舞遮大鼎大灶是汗流汗滴，毋過看著逐家食甲削削叫、笑甲喙仔裂 sai-sai，較忝伊嘛是心甘情願。

作者：陳昭蓉

### ☆詞彙學習☆

【趁食】thàn-tsiàh：討生活。賺錢過活，比喻營生。

【後頭】āu-thâu：娘家。

【倚家】khia-ke：住家。

【操心擘腹】tshau-sim-peh-pak：擔憂掛慮，形容非常煩惱。

【目墘】bák-kinn：眼眶。

【食食】tsiàh-sit：飲食。